



Inatsisartuni ilaasortaq
Justus Hansen
/Maani

Pineqartoq: § 36, imm. 1 naapertorlugu apeqqummut nr. 2010-125-mut akissut

Asasara Justus Hansen,

Aallarniutigalugu apeqqutitit pillugit qutsavigaakkit:

1. Suna pissutaava nunat allamiut umiarsuaasa – Islandimiuunerusut – Tasiilamut tikissinnaanginnerannut piffissami RAL-ip angallavissarinngisaani?

AKISSUT: Aningaasaqarnikkut uatsinnut sinaakkusiussat iluanni, innuttaasut Kalaallit Nunaata kitaani Tunumiluunniit illoqarfiit nunaqarfiilluunniit arlaanni najugaqarnerat apeqqutaatinnagu pitsaanerpaamik pilersuinissamik qanoq iliorluta qulakkeerisinaanerluta oqallittuarnissarput, pilersuinermi akisussaasutut soqutigisorujussuara. Taamaattumik Kalaallit Nunaata kitaanut imaluunniit Tunumut pilersuinermut atatillugu ajornartorsiutaasut eqqumaffiqeqalernissaat isumagigakku qutsavigaakkit.

Kalaallit Nunaannut, Kalaallit Nunaanniit aamma Kalaallit Nunaanni imaatigut assartuussineq pillugu Inatsisartut peqqussutaanni § 4, imm. 2 naapertorlugu imaatigut assartuussinissamut akuersissut kisermaassisussaataaaffilimmik tunniunneqarsinnaavoq.

Royal Arctic Line A/S (RAL) kisermaassisussaataanermik taamaattumik akuerineqarsimavoq. Taamaattumik umiarsuaatileqatigiiffiit allat tunngaviumik Kalaallit Nunaannut, Kalaallit Nunaanniit aamma Kalaallit Nunaanni nassiussanik, Royal Arctic Line-p assartorsinnaasaanik assartuisinnaatitaangillat, aamma Royal Arctic Line-p imaatigut angallassinnginnerata nalaani.

Royal Arctic Line-p angallassinissanut pilersaarutaa pingaarneq Naalakkersuisunit akuerineqartarpoq. Taanna aningaasartuutini amerlasuunik – RAL-imut aamma nassiussanik tiguisussamut – kinguneqartarmat, sikut pissutaallutik tikittussanik taamaatitsisariaqartarneq pissutigalugu Royal Arctic Line-p pilersaarusiormini tikittusaaq siulleq sapinngisamik kingusissumut, taamaallunilu sapinngisamik sikut annikinnerpaaffigisassaannut inissittariaqartarpaa.

Kisiannili Tunumi najugaqartut umiarsuaatileqatigiit allat Royal Arctic Line-p angallaviisa avataanni pilersuinissamik kissaateqartarsimmata, ukiumut marloriaannarlutik pilersorneqartarneq naapertuutinngitsutut misigisinnaasarmassuk paasillaarsinnaavara.

18. juni 2010
Sagsnr. 2010-032210
Dok. Nr. 401083

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Tamannali pissappat ingerlatsisinnaanissamut akuersissut, aatsaat ukiut tamaasa decembarimi ukiunik marlunnik sioqqutsilluni Naalackersuisunit imaluuniiit Royal Arctic Line-mit atorunnaarsinneqarsinnaasoq atorunnaarsinneqartariaqassaaq.

Tullianik Royal Arctic Line-mut ingerlatsisinnaanissamut akuersissutip nutarterneqarnissaanut isumaqatigiissusiulerutta isummersuutitit ilanngukkusuppavut.

Kisiannili ingerlatsisinnaanissamut akuersissummi isorliunerusuniittut Nunap Karsianiit tapiissutitaqanngitsumik akuttoqatigiinnik pilersorneqarnissaat qulakkeerneqartarpoq.

Taamaattumik eqqarsaatigisassat – akuttunngitsumik imminnut assortuuttut – amerlasarput, taamaattumillu nassiussanik imaatigut angallassinermut akuersissummi piumasaqaatit allanngortinneqarnissaannik aalajangiisoqartinnagu sukumiisumik misissuisoqartariaqarpoq. Assartuussineq pillugu Isumalioqatigiissitap sulinera tassunga iluaqutaassasoq siunertarineqarpoq. Isumagali malillugu aammattaaq siunissami isorliunerusuni sumiiffiit inukitsut pilersorneqarnissaat qulakkeerniarlugu, nassiussanik imaatigut angallassisarnerup iluarsineqarnissaa pisariaqarpoq.

2. Suna pissutaava, nioqqutissat nutaat Islandimeersut timmisartumik Tunumi niuertunut ingerlaannaq assartorneqarsinnaannginnerannut?

AKISSUT: 2006-imiit 2010-mut Ammassallip eqqaatalu qulimiguulimmik timmisartuussivigineqartarnera pillugu isumaqatigiissut naapertorlugu Tunumi allakkanik, ilaasunik, poortukkanik nassiussanillu, taagorneqarnerat malillugu tulleriaarlugit, assartuussinermi piumasat naammassiniarlugit timmisartuussinissaq Air Greenlandip pisussaaffigaa.

Nassiussat tulleriaarinermi kingulliutinneqarmata, nassiussanik tigusinissamut utaqqisoqartariaqartarpoq. Air Greenlandimit ilisimatitsissutigineqartut malillugit nalinginnaasumik ullut marlussuit utaqqisoqartarpoq. Tassunga assersuutitut taaneqassaaq, Kangerlussuarmi nassiussat nalinginnaasumik ullormi ataatsimi utaqqineqartarmata. Air Icelandip nassiussat qanoq amerlatigisut assartortussaasarnerai, Air Greenlandip ilisimareernej ajoramiuk, Air Greenlandip nassiussat ingerlaqqinnissaannut pilersaarusiorsinnaasannginnera Tunumi sivisunerusumik utaqqisarnermut pissutaavoq. Kisiannili najukkami niuertut Air Greenlandimi attartortitsisarnermut immikkoortortaq tamanna pillugu ilisimatitsissuteqarnissaminnut tikilluaqqusaapput. Tamatuma kingorna Air Greenlandip ingerlatseqatigiiffiup pilersaarusiortarnermini nassiussat amerlassusissaattut naatsorsuutigineqartut eqqarsaatigisarnissaat misilissavaa, taamaalillunilu nassiussat tiguisussamit sukkannerusumik tiguneqarsinnaalissapput.

KNi A/S aperineqarnermini ilisimatitsivoq, Pilersuisoq Islandimiit paarnanik naatitanillu iniminniisartoq, aammalu Tasiilami heliportimut nammineerluni aallertartoq.

Inussiarnersumik inuulluaqqusilluta